

國方志叢書·華中地方·第九〇六號

據

清·王維新等修，涂家杰等纂
清同治十二年刊本

影印

江 西 省

義寧州志

(七)

成文出版社有限公司印行

義甯州志卷第三十二

藝文志 記下

國朝

銅鼓石重修永甯石橋記

知州賀維錦 撰 共

周禮夏官司險掌九州之圖以周知山林川澤之阻而達其道路達者通之調也通乎山林以車馬通乎川澤以楸梁其大較也按爾雅梁莫大於渙梁郭璞註梁卽橋也秦以前以木漢以後以石雅詩造舟爲梁無論已秦都咸陽渭水貫都造渭橋及橫橋便橋並跨渭以木爲梁迨漢灞橋以石作梁橋之用石於是乎昉則石橋之設顧不重哉義甯爲古豫章

一大西磬西南銅鼓石尤爲險要錦不佞牧是邦已四年矣
是邦事劇地寬山幽路窄東馬懸車幾無乎不逮銅鼓距州
治百五十里而遙年來憶曾五至見夫山澤津梁塞者闢之
廢者舉之豐碑鼉肩所在多有詢之士人僉曰某良士某良
士所修葺而振興者也不佞憑軾低徊拂拭者久之今歲閏
五月望後六日不佞因查閱水道公趨銅鼓有衣冠數輩祇
迎郭外者閱手版知爲武生周嵩國學溫拱宸帥廷超黃寶
樹武生盧定魁國學陳際昌盧煜辰里民何湯麟帥匡安等
諸君甫下車卽正立拱手曰大夫爲水來乎是水也發源大
瀉厯西湖過官坡東會青草嶺出河塘入溫湯合流抵銅鼓

石一屨兩市間往來日凡千百輩奔騰浩瀚非橋不爲功且
乘橋安古誌之矣前途巍然在望者固不日成功之永甯橋
也願大夫策駟馬高車留題此柱俾垂不朽言訖隨行不數
十武如虹梁之亘天半其式也如魚鱗之相比次其密也如
軒如軒如飛如舞則繚以欄垣五色狻猊之絢爛奪目也不
佞一再低徊不能去者又久之夫人之立心行事莫難乎堅
且銳耳苟意堅力銳譬諸水然岷源起濫觴泛泛之江達五
湖卒朝宗於海趨事赴功亦猶是也攷是橋肇始雍正甲寅
年間舊志亦未及詳載惟聞是役也諸紳耆不惜工不吝財
而水明心旣堅且銳未及三年費白金六千餘用成義舉計

五礅三碧長一十六丈四尺廣一丈五尺四寸高三丈五尺
零潤乎

聖天子以義嘉美於是州之爲名實相實也從此而甯人甯
國永永無極不特爲一州倡且爲江南西道倡化險爲平俗敦
古處炳焉與三代同風詎不偉歟抑聞之徒杠輿梁爲王道
之一實司民牧者之責也錦不佞不能創始幸觀厥成彌滋
愧矣所有倡捐職官階級暨其勸州人士姓氏例得附書碑
陰不復贅云時嘉慶十三年戊辰夏六月上澣

濟美橋記

知州周澍

昔子產聽鄭政以乘輿濟人於溱洧孟子曰惠而不知爲政

誠以其心餘於惠而事不足以濟也夫存心愛物於人必有
所濟豈必有行政之權而始有濟人之事耶嘉慶丁丑秋七
月余捧檄來分甯適有事於武鄉道經黃荊洲陂坑大河之
間有橋焉巍然坦然行者絡繹因思洲渚當州地孔道日度
千屨脫無橋其病涉不下溱洧卽百乘輿亦未克人人而濟
之矣詢之都人士知橋爲賴氏創而未知其詳亦僅心焉識
之耳戊寅冬賴生錫疇來謁余自言其先世自閩遷甯卜居
洲上其大父程山翁目擊病涉惻然動心初支以木復潰於
水繼爲石墩五擬修石梁有志而未逮生父兄弟等勉力繼
志落成於嘉慶辛酉年嘻此舉良足嘉矣是非存心愛物於

人必有所濟耶抑豈必有行政之權而始有濟人之事耶夫
表善以振淳風有司事也爰名其橋曰濟美而紀其事於石

重修甯遠橋記

州同 范玉琳 潤齋

銅鼓石溫泉之下游爲雙港口合流而匯於甯遠橋其源自
鐵爐峯左通瀏邑右達平江稱吳楚之要津舊有石橋曰甯
遠往來行人如履坦途其創始在乾隆二十二年倡修者有
周述三吳斯及楊祥麟諸君子共成斯美數十年來春夏泛
漲兩岸漸頽又賴里中諸君次第葺補嘉慶二十二年橋復
漸圯廣募得千餘金鳩工甃石經始於夏告竣於冬而橋巍
然以立波濤之洶湧不得而衝擊也行李之往來不至於病

涉也非風俗之淳美人情之慷慨曷克臻此况諸君以甯靜致遠之才敬恭於桑梓仁惠於鄉里其所以薰德善良者又豈獨斯橋之舉也哉

新修景雲橋記

知州周澍

景雲橋者州治西南奉仙鄉百二十里曰觀溪州司馬張君雲亭獨出鼎新之者也觀溪之水源自祥雲山折白水洞飛瀑縣練淵渟於麻源石達於觀溪道嶺之足衢通吳楚瑞袁新吳之界尤密邇口往來如織春夏漲湧涉溪者時多漂溺雲亭怒焉傷之曰吾聞以財粟濟人暫而難周以橋梁濟人久而能溥觀溪通津也人卒病涉吾何忍哉於是毅然買山

伐石經營方始未幾而疾作泊彌畱猶諄諄以橋事未成爲憾逾年其子英偉麟泰俊孫承翰承烈等遵遺命召工匠製輓轆羅沙剔泥截溪戽水鑿之空空下窮五丈得底石排魚鱗以磨礮錯犬牙以疊甃規圓矩方屹然山立其工始於嘉慶二十二年春至二十四年告厥成高三丈有咫袤十五丈有奇廣一丈六尺闢橋門者六碧玉潺潺長虹宛宛何其壯且麗哉費白金三千八百餘兩雖諸嗣君不恡費不辭瘁怡怡然同心協力皆雲亭指畫形勢有以開其先也君諱鳳翔字景茂別字雲亭遂取表德以名橋橋成而張君之志旣矣張君之名且不朽矣戊寅春余因公至湖山見舊相識君之

子泰述其先人修橋顛末丐爲文夫揚善行勵風俗吾職也
遂退而爲之記

修毛竹山路記

南昌楊 燁星園
知府

嘉慶四年秋余奉檄攝甯州篆馳驛視事山奉新抵州之東
南界道過毛竹山見其層巒疊嶂上爲懸崖下爲深谷羊腸
鳥道一綫相通古之所謂捫參歷井百步九折當不是過未
嘗不心焉識之旣而披閱分甯舊志稱此山向來路塞宋治
平間里人余奭始開山鑿石以便行旅至今賴之歲月積久
滄桑變更碍道之荆榛多有未除累碁之犖确不免壅阻往
來行人每有足將進而趨趄者此亦守土者之責也今年春

原稿缺

原稿缺

者因思我

國家湛恩汪濊澤及枯骨而山野荒郊猶積朽若此嗚呼燐燐白骨暴露於苦雨淒風是誰之過與余輩雖掩骼有心苦埋瘞無地因歸而謀諸先生先生不禁躍然願以祖山旁壤爲叢塚地而諸友始得藉以成其義或棺而歛或耕而收隨其骨之完毀而各爲經理不一月間暴於野者皆得以藏於山焉夫陳氏先世有隱君子諱郇者修學校賑窮黎曾市北郭之地爲義塚用以安旅魄而免暴棲都憲南山爲之紀其義炳載州乘迄今塚且滿而先生獨力鼎建學宮旣無愧於先德復慨然爲義塚之施地益加擴土益加爽詩曰以似以續

續古之人非先生之調歟余恐其久而事或湮將無以爲來
者勸歲乙卯方應房考聘寓豫章之東湖偶憶其事而筆之
維時樂義施山輸資首倡者則明經玉亭譚昌言募窮瘞旅
者則文學陳子在左譚嘉淇徐子后武譚建烈棣考徐聘三
譚鎮國備塋具收骸骨者則文學陳子后英譚懋彰其會計
工費督役封土則諸人姓名未能悉書焉

惠疾堂記

知州 賀維錦

周禮地官大司徒職以保息六養萬民五曰寬疾又小司徒
職辨其貴賤老幼廢疾而鄉師之職更以歲時巡國及野調
萬民之羸厄以王命施惠古王者君民一體子惠困窮故於

一官之中三致意焉典至隆責匪輕也而行之於士大夫爲尤難學博查君淡軒經明行修州之誠樸君子也歲丁卯長夏憫梓桑山鄉遼濶顛連無告者眾普濟諸院又限於額爰另構一區於城北紫花墩之西隅並捐腴田六十三畝零計租百二十餘石顏曰惠疾堂有功而不自德泊如也居有間邦之紳耆余孝廉仞山胡明經星垣等呈請獎勵俾垂永久予維睦婣任卹之風今不古若者比比矣查君獨毅然一身仔肩且再三籲懇無庸上聞臺司殆清畏人知敬行不怠者歟其在甘氏星經有云陰德二星在尙書西主天下綱紀陰德遺周給惠賑財之事士大夫矜不成人即可上應列宿宜

查君之長享大年康強逢吉以壽星而輝映乎陰德二星也
從此疲癯殘疾靡不得所傳之奕禩如漢何比干之手清數
千人天錫符策子若孫印綬纍纍家之光亦

國之慶也書洛誥篇曰惠篤敘母有邁自疾真查君命名之謂
矣用謹書之以爲一州之汲古通經種德不倦者勸時嘉慶
戊辰正月立春前一日撰

活水園記

翰林
編修熊爲霖鶴橋

戊辰秋遊西安凡三閱月於燕薈寄賓竹於劔山寄留雪於
白亭寄南岫山房地皆雅麗得名構以傳最後入郭城訪宗
子雪硯墨顛月舫楓麓昆季下榻活水園相得歡甚日以詩

酒豪倡酬稍暇述其先君子締園之始及續葺渲染一一具
悉因嘆梓澤蘭亭今復安在文章之外盡歸烟莽耳敢屬筆
傳此區請甚力予重感其意爲泚筆記之園踞楓山麓勢稍
衍面天馬峯壁立如控勒八垣繞絕嶂削芙蓉萬樹不可詳
記園方廣里許規其中爲堂堂皇皇然南向許刺史樵香顏
以墨香書屋琴劍竹策羅列錯綜託此弦誦舞嘯足永朝夕
廉其右爲石牖古色嵌剝滿几栽雲根磊雪刮鋏不盡其妙
啟窗肆覽如坐鬱林舟中隅東南齋曰珍硯蕉白鵬綠玉帶
金星遺意殊陸離東北曰蘭窻與居息香氣滌塵霧堂下樹
槐柳列蕉如雁翅雜布秋色獨古梅遺蹟益若不欲與人